



**TEKS UCAPAN ALUAN
YANG BERBAHAGIA
DATUK RODZI MD SAAD
KETUA PENGARAH MAMPU**

SEMPENA

**MAJLIS ANUGERAH INOVASI PERDANA
SEKTOR AWAM (AIPSA) TAHUN 2023**

**7 NOVEMBER 2023 (SELASA), 8.00 PM
DEWAN PERDANA, PICC**

Bismillahirrahmanirrahim

Terima Kasih Pengacara Majlis

**Yang Amat Berhormat Dato' Seri Anwar bin
Ibrahim**
Perdana Menteri

**Yang Amat Berhormat Dato' Seri Dr. Ahmad
Zahid Hamidi**
Timbalan Perdana Menteri

Yang Berhormat Ahli Jemaah Menteri

**Yang Berbahagia Tan Sri Dato' Seri Mohd
Zuki bin Ali**
Ketua Setiausaha Negara

**Yang Berbahagia Dato' Seri Dr. Zulkapli
Mohamed**
Ketua Pengarah Perkhidmatan Awam

Ketua-Ketua Setiausaha dan Ketua-Ketua Perkhidmatan, Ketua-Ketua Jabatan, wakil-wakil agensi Kerajaan Persekutuan, Kerajaan Negeri, Badan Berkanun, Pihak Berkuasa Tempatan, Institusi Pengajian Tinggi, rakan-rakan media serta peserta-peserta inovasi yang diraikan.

Alhamdulillah, syukur kita ke hadrat Allah SWT kerana dengan limpah rahmat dan izinNya, dapat kita bersama-sama berkumpul dalam Majlis Anugerah Inovasi Perdana Sektor Awam (AIPSA) Tahun 2023 pada malam ini.

2. Terlebih dahulu, saya ingin merakamkan ucapan syabas dan tahniah kepada seluruh warga MAMPU atas penganjuran majlis yang berprestij ini. Setelah beberapa tahun program anugerah ini ditangguhkan, akhirnya pada tahun ini ia dapat dilaksanakan kembali sejajar dengan agenda semasa negara.

3. Kehadiran Yang Amat Berhormat Perdana Menteri dan Ahli Jemaah Menteri pada malam ini telah memberi mesej yang jelas kepada kita bahawa Daya Cipta atau Inovasi merupakan agenda utama Kerajaan yang perlu diberi perhatian serius.

4. Begitu juga kehadiran Yang Amat Berhormat Dato' Seri Dr. Ahmad Zahid Hamidi, Timbalan Perdana Menteri. Kehadiran Yang Amat Berhormat, memberi suntikan semangat yang begitu bermakna kepada kami semua.

5. Saya juga ingin merakamkan ucapan terima kasih dan setinggi-tinggi penghargaan kepada Yang Berbahagia Tan Sri Dato' Seri Mohd Zuki bin Ali, Ketua Setiausaha Negara, yang juga merupakan Pengurus Jawatankuasa Pemilihan AIPSA atas segala nasihat dan panduan yang telah diberikan kepada kami semua di MAMPU.

6. Komitmen kesemua kepimpinan negara untuk hadir pada malam ini begitu signifikan kepada seluruh penjawat awam. Ini kerana melalui inovasi-lah negara kita akan terus mampu bersaing dengan negara maju lain di dunia, serta membolehkan kita bukan sekadar menjadi negara pengguna inovasi, bahkan sebagai pencipta inovasi baharu yang menjadi *benchmark* kepada negara lain di peringkat global.

Yang Amat Berhormat Dato Seri dan para hadirin yang dihormati sekalian,

7. Anugerah inovasi yang diperkenalkan dalam sektor awam sejak 1990-an bertujuan untuk mengiktiraf dan meraikan agensi yang telah memberi sumbangan signifikan dan nilai tambah kepada penyampaian perkhidmatan awam demi kesejahteraan rakyat.

8. Jika dahulunya ia dikenali sebagai Anugerah Kualiti Perdana Menteri atau AKPM dan Anugerah Kualiti Perkhidmatan Awam atau AKPA, kini Anugerah ini dijenamakan semula sebagai Anugerah Inovasi Perdana Sektor Awam atau ringkasnya AIPSA setelah melalui beberapa fasa penambahbaikan dengan matlamat untuk memberi pengiktirafan dan menyemarakkan budaya inovasi dalam sektor awam.

9. Sejajar dengan hasrat nilai Daya Cipta dalam agenda Malaysia MADANI, AIPSA dilaksanakan sebagai medium untuk menyemai dan memperkasakan inovasi, mewujudkan budaya kerja yang mantap dan hasilnya, dapat melonjakkan kecemerlangan penyampaian perkhidmatan awam dengan memanfaatkan platform pendigitalan.

10. Dengan tema Malaysia MADANI Memperkasa Inovasi, AIPSA juga dilaksanakan dengan hasrat untuk:

- i. Mewujudkan dan menyemai DNA Inovasi dalam agensi sektor awam bagi meningkatkan penyampaian perkhidmatan kepada rakyat;**

- ii. Mewujudkan platform bagi menggalakkan perkongsian pengetahuan dan kolaborasi pada peringkat nasional dan global; dan
 - iii. Mengiktiraf hasil inovasi agensi sektor awam pada peringkat nasional.

11. Selain AIPSA, majlis pada malam ini juga turut meraikan pemenang-pemenang bagi pertandingan Konvensyen Kumpulan Inovatif dan Kreatif Sektor Awam atau ringkasnya KIKSA, dan *Challenge on Innovation and Problem Solving Through Technology Advancement (CHIPTA)* yang telah diadakan pada bulan September dan Oktober yang lalu.

12. Konvensyen KIKSA merupakan pertandingan Kumpulan Inovatif & Kreatif (KIK) yang dilaksanakan bagi mewujudkan budaya inovatif dan kreatif, menyediakan platform perkongsian dan pengiktirafan projek K.I.K dengan tujuan untuk meningkatkan kualiti kerja dan keberkesanan sistem penyampaian perkhidmatan.

13. Manakala, program CHIPTA pula menyediakan platform kepada masyarakat untuk mereka cipta pelbagai penyelesaian yang berinovasi dan kreatif dengan menggunakan teknologi terkini berasaskan pembangunan aplikasi mudah alih dan pemanfaatan data terbuka.

14. AIPSA, KIKSA, dan CHIPTA telah memperkenalkan pelbagai trek atau bidang pertandingan. Sebanyak empat (4) trek dipertandingkan di bawah AIPSA iaitu Trek Sosial, Trek Ekonomi, Trek Infrastruktur dan Trek Keselamatan & Pentadbiran.
15. KIKSA pula mempertandingkan empat (4) bidang dan kategori iaitu bidang Inovasi Penyampaian Perkhidmatan bagi kategori Penciptaan dan kategori Penambahbaikan, dan bidang Inovasi Sosial bagi kategori Penciptaan dan kategori Penambahbaikan.
16. Manakala CHIPTA pula menyediakan empat (4) kategori yang dipertandingkan iaitu Sektor Awam, Orang Awam atau Industri, Pelajar Institusi Pengajian Tinggi, dan Pelajar Sekolah Menengah.

Para hadirin sekalian,

17. Usaha bagi melestarikan budaya inovasi sebagai teras pemodenan penyampaian perkhidmatan awam perlu dilakukan secara berterusan. Agensi sektor awam perlu sentiasa menghasilkan penciptaan kreatif dan inovatif yang boleh mentransformasikan penyampaian perkhidmatan awam agar menjadi lebih baik bagi memenuhi ekspektasi rakyat dan negara.

18. Sebelum mengakhiri ucapan, saya sekali lagi ingin merakamkan ucapan terima kasih dan syabas kepada semua pihak di atas kerjasama bagi penganjuran anugerah ini. Dan sekali lagi tahniah diucapkan kepada agensi-agensi yang telah mengambil bahagian dalam anugerah AIPSA ini juga termasuk KIKSA dan CHIPTA.

19. Saya amat berharap untuk melihat pembudayaan inovasi terus dilaksanakan secara meluas dalam sektor awam.

20. Buat penerima-penerima anugerah nanti, setinggi-tinggi tahniah diucapkan dan jadikanlah kemenangan ini sebagai pendorong semangat untuk terus berinovasi dalam memberikan perkhidmatan terbaik kepada rakyat.

21. Sekali terima kasih diucapkan kepada Yang Amat Berhormat Perdana Menteri, Ahli Jemaah Menteri, KSN, KPPA, para KSU dan KP yang sudi hadir bersama kita pada malam ini.

**Sekian. Wabillahitaufiq wal hidayah
wassalamualaikum warahmatullahi
wabarakatuh.**